

VENDIM
Nr.503, datë 30.6.2005

**PËR ORGANIZIMIN, KOMPETENCAT DHE FUNKSIONIMIN E AGJENCISË SË
ADMINISTRIMIT TË PASURIVE TË SEKUESTRUARA DHE TË KONFISKUARA**

Në mbështetje të nenit 100 të Kushtetutës, të pikës 2 të nenit 36 të ligjit nr.9284, datë 30.9.2004 “Për parandalimin dhe goditjen e krimit të organizuar”, të neneve 21 e 27 të ligjit nr.8379, datë 29.7.1998 “Për Buxhetin e Shtetit të Republikës së Shqipërisë”, dhe të nenit 10 të ligjit nr.9339, datë 21.12.2004 “Për Buxhetin e Shtetit të vitit 2005”, me propozimin e Ministrit të Financave, Këshilli i Ministrave

VENDOSI:

1. Agjencia e Administrimit të Pasurive të Sekuestruara dhe të Konfiskuara, më poshtë Agjencia, është institucion buxhetor, në varësi të Ministrit të Financave.

2. Agjencia merr masat e nevojshme për administrimin e fondeve dhe të pasurive të sekuestruara dhe të konfiskuara, të personave të dyshuar apo të shpallur si pjesëmarrës në krimin e organizuar, sipas vendimeve gjyqësore, të formës së prerë.

3. Agjencia ka këtë objekt të veprimtarisë:

a) Bashkëpunon me institucionet pjesëmarrëse në procesin e administrimit dhe të konfiskimit të pasurive, si me gjykatat, prokurorinë, njësitë e qeverisjes vendore dhe zyrat e regjistrimit të pasurive të paluajtshme, ku ndodhen pasuritë e paluajtshme, të konfiskuara.

b) Përgatit raportin e vlerësimit tekniko-financiar, të cilin ia paraqet për miratim e vendimmarrje Ministrit të Financave, në përputhje me pikat 2 e 3 të nenit 31 të ligjit nr.9284, datë 30.9.2004.

c) Autorizon administratorin e caktuar në vendimin për sekuestrimin e pasurisë, që, në raste të veçanta, të kërkojë ndihmën e specialistëve apo të personave të tjerë.

4. Agjencia përbëhet nga 3 (tre) administratorë, njëri nga të cilët është kryeadministrator, dhe 1 (një) specialist i rrjetit kompjuterik për ngritjen, mbledhjen dhe përpunimin e të dhënave për pasuritë e sekuestruara dhe të konfiskuara.

Marrëdhëniet e punës së punonjësve të Agjencisë rregullohen me ligjin nr.7961, datë 12.7.1995 “Kodi i Punës i Republikës së Shqipërisë”, të ndryshuar.

5. Kryeadministratori emërohet nga Ministri i Financave dhe ka këto detyra dhe përgjegjësi:

a) Drejton dhe administron veprimtarinë e Agjencisë dhe përgjigjet para Ministrit të Financave për veprimet e ndërmarra gjatë ushtrimit të kësaj veprimtarie.

b) Harton rregulloren e brendshme të Agjencisë, të cilën ia paraqet për miratim Ministrit të Financave.

c) Përgjigjet para Ministrit të Financave për procesin e sekuestrimit dhe të konfiskimit të pasurive.

ç) Përfaqëson Agjencinë në marrëdhënie me të tretët, në përputhje me rregulloren e brendshme.

d) Pas verifikimit të kërkesave të paraqitura nga institucionet e parashikuara për financimin e projekteve për administrimin e pasurive të paluajtshme të konfiskuara, si dhe të atyre të përcaktuara në pikat 2 shkronjat “a”, “b”, “c” e “ç”, e 3 të nenit 39 të ligjit nr.9284, datë 30.9.2004 “Për parandalimin dhe goditjen e krimit të organizuar”, përgatit dokumentacionin përkatës, të cilin ia dërgon për mendim Komitetit Këshillues të Masave kundër Krimit të Organizuar dhe ndjek zbatimin e këtyre projekteve.

6. Administratorët e ushtrojnë veprimtarinë në çastin e caktimit, me vendim gjykatë të formës së prerë, të sekuestros mbi pasurinë, me propozimin e Agjencisë, në përputhje me nenin 19 të ligjit nr.9284, datë 30.9.2004.

7. Të drejtat dhe detyrat e administratorit të Agjencisë janë:

a) Të urdhërojë pronarin e pasurisë së sekuestruar ose të konfiskuar të paraqesë:

i) një raport për pasurinë, me qëllim evidentimin e përdorimit të saj;

- ii) librat e llogarisë për pasurinë e sekuestruar apo të konfiskuar.
- b) Të dërgojë raportin periodik para gjykatës, për administrimin e pasurisë së sekuestruar, ku përfshihet edhe përshkrimi i ndalimeve, të përcaktuara në nenin 21 të ligjit nr.9284, datë 30.9.2004.
- c) Të dërgojë te prokurori, në raste të veçanta, raportin e administrimit të pasurisë së sekuestruar.

Kur e çmon të nevojshme, për përmbushjen e detyrave, kërkon ndihmën e ekspertëve, sipas fushave të caktuara, të cilët shpërblehen për punën e bërë sipas akteve ligjore e nënligjore, në fuqi.

8. Përdorimi dhe shitja e pasurive të paluajtshme, e mjeteve monetare dhe e pasurive të luajtshme bëhet në përputhje me nenet 33, 34 e 35 të ligjit nr.9284, datë 30.9.2004 “Për parandalimin dhe goditjen e krimit të organizuar”.

9. Ministrisë së Financave, në buxhetin e miratuar për vitin 2005, t’i shtohet fondi prej 2 000 000 (dy milionë) lekësh, për përballimin e efekteve financiare për ngritjen dhe funksionimin e Agjencisë së Administrimit të Pasurive të Sekuestruara dhe të Konfiskuara.

10. Ky fond të përballohet nga fondi rezervë i Këshillit të Ministrave.

11. Ngarkohen Ministria e Financave dhe Agjencia e Administrimit të Pasurive të Sekuestruara dhe të Konfiskuara për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Fatos Nano